

太上消災祈福醮儀

先奏告關牒 禁壇 祝如常式

次啟堂頌

次各禮師 存念如法

次宣五方衛靈神咒

東方

九炁青天 明星大神 煥照東鄉 洞映九門

轉燭陽光 掃穢除氛 開明童子 備守我軒

收魔束妖 上對帝君 奉承正道 赤書玉文

九天符命 攝龍驛傳 普天安鎮 我得飛仙

南方

南方丹天 三炁流光 熒星轉燭 洞照太陽

上有赤精 開明靈童 總禦火兵 備守三宮

斬邪束妖 剪截魔兇 北帝所承 風火八衝

流鈴交換 敢有不從 正道流行 我享上功

保天長存 億劫無終

太上消災祈福醮儀

清微藏書閣

西方

七炁之天 太白流精 光耀金門 洞照太冥

中有素皇 號曰帝靈 保神安鎮 衛我身形

斷截邪源 正道開明 宮殿整肅 三景齋并

道合自然 飛升紫庭 靈寶符命 普惠萬生

功加一切 天地咸寧

北方

北方玄天 五炁徘徊 辰星煥爛 光耀太微

黑靈尊神 飛仙羽衣 備衛五門 檢精捕非

敢有干試 豁落斬摧 玉符所告 神振八威

邪門閉塞 正道明開 映照我身 三光同輝

策空駕浮 舉形仙飛

中央

黃中理炁 總統玄真 鎮星吐輝 流煥九天

開光童子 一十二人 元炁陽精 炎上朱煙

洞照天下 及臣等身 百邪摧落 殺鬼萬千

中山神咒 普天使然 五靈安鎮 身飛上仙
次都講唱 鳴法鼓二十四通
次發爐

無上真玄五靈老君 當召功曹使者 左右龍虎君 捧香使者 三炷
正神 急上關啟
三天真元道君

臣今正爾燒香 修齋設醮 謹奉為醮主弟子臣某為齋意 其餘
誠懇 具載青詞 願得太上十方正真生炁 降流入臣等身中 令臣
所啟 速達逕御

至真無極大道三清上聖
昊天玉皇上帝 御前

次眾官 各長跪出官

謹出臣身中五體真官功曹吏 出上三天 執法開化 陰陽功曹
度道消災 散禍解厄君吏各十二人出 臣所受法籙治中建節監功
大將軍前部 效功後部 效殺驛廷 令驛延丞 四部監功謁者 上
仙上靈 直使功曹左右官使者 陰陽神決吏官 各二人出 出者

太上消災祈福醮儀

清微藏書閣

嚴裝顯服 冠帶垂纓 整其威儀 功曹弁朱陽之幘 冠通天之冠
衣皂紬單衣 腰帶龍頭之劍 捧持謁簿使者 弁玄陰之幘 冠九德
之冠 衣絳章單衣 腰帶虎符 齊執玉版 直事功曹 住立四方
正一功曹 住立中央 治病功曹 營衛臣身 左官使者 建節在前
右官使者 持幢在後 陽神決吏 立左 陰神決吏 立右 上部
功曹 住立上方 中部功曹 住立身中 促炁功曹 催促十方 上
部使者 遠望上天 中部使者 遠瞻八方 都官使者 匝繞臣身
郎吏虎賁 察姦鉤騎 都官侯射 天丁力士治正 執正吏收神 食
神吏收鬼 食鬼吏收炁 食炁吏收毒 食毒吏收精 食精吏收邪
食邪吏誅符 破廟吏剛風 騎置吏驛馬 上章吏飛龍 騎吏等並皆
屯住臣左右前後 受臣詞語 關啟
此間土地里社正神 監察考召甲子諸官君將吏

謹同誠上啟

太上無極大道太上老君 太上丈人
九老仙都君 九炁丈人
百千萬重道炁 千二百官君

太清玉陛下 恭以天人交感 在祈祐以所符 陟降中潛 非至誠之
不格 唯精衷之內控 仰元鑒之有門 矧蕊笈之真詮 廓靈科而示
教 璇穹大象 霄景神輝 有躔次以下臨 有休祥之外繫 今醮主
某為某事 肅嚴壇供 仰駐神遊 庶伸蘋藻之誠 以竢監觀之應
詞言通感 不負效心 伏乞功曹使者 將吏靈官 速上奏陳 應時
感降 所祈獲遂 所願協從 臣與醮主誠惶誠恐 稽首再拜以聞

次各稱名位

具法位臣某等謹同誠上啟

虛無自然元始天尊

無極大道太上道君

太上老君混元上德皇帝

太上開天執符御曆含真體道昊天玉皇上帝

紫微天皇大帝

紫微北極大帝

南極注生大帝

斗中天尊玉帝星君

太上消災祈福醮儀

清微藏書閣

十神太一真君

十一曜星君

北斗七元星君

左右輔弼星君

南斗六司星君

天地水三官

二十八宿星君

九天儲福定命真君

九天應元保運真君

九天司命司錄真君

九天掌籍掌算真君

九天監生延生大神

玄中大法師正一人

三天輔玄大法師

天曹太皇萬福真君

天曹定名玉曆真君

天曹延生保命真君
天曹扶衰度厄真君
天曹掌籍掌算真君
天曹財庫祿籍真君
天曹司命司錄真君
天曹司非司危真君
天曹門下引進真官
天曹門下上章直日典者
洞淵水府福地靈曹
見生星斗真君 本命元辰真官
城隍里社土地真官
三界官屬 一切威靈

臣聞玉天嚴遠 難陞浩劫之家 金洞渺清 徒仰素靈之館 粵
帝尊而在上 握化紀以居中 啟十方之無礙 心應物而動 號三界
之大慈 父視人如殤 俯仰鬱羅之臺 卷舒投芥之劫 迴瞻萬兆
悲晉晷於蜉蝣 俯盼九塵 嗟漢宮於螻蟻 永惟下俗 本絕真階

太上消災祈福醮儀

清微藏書閣

蓋憑開度之科 許罄精微之懇 今醮主弟子某為某事 嚴持信幣
密款仙庭 冀天貺以臨觀 庶人心而專達 伏望三清併軌 離曲密
之華房 十極流輶 從飛虛之法駕 百億天帝 後轡丹飆 千二官
君 前迎翠節 擲火萬里 下呼陽而召陰 旋香三輪 上出日而入
月 極東浮於熾水 盡西景於虞汧 南造朱陵之宮 中盤黃炁之府
朔陰之館 北盡於夜城 丘寒之泉 下殫於神谷 至於魯 稱教
父 由太極之從行 西號釋尊 自延真而密侍 元始符命 疇敢不
祇 輒布菲詞 仰披雲望 叩碧天而祀事 稱聖號以降神 伏願曲
鑒凡情 允垂颺駕 臣與醮主等謹稽首再拜上請

次請聖位 上香 上茶 獻酒

次奏初獻法事

次重稱法名

具位臣某等謹同誠上啟

三清上聖 十極高真 醮位靈仙 三界主宰

臣聞 一真布景 本無高下之基 萬兆肖形 盡毓清和之炁
即生死而寢遠 遂好惡以森繁 穢身縱溺於沉迷 大道尚垂於營救

或罪根之彌甚 始陰責以潛加 苟悟百非 即消萬禍 今醮主弟子某識神冥滯 營魄振驚 由浩劫以淪胥 俾元靈而奔蹶 不趨覺路 樂登陟於迷途 不憩真庭 甘奔馳於世網 念迴還於先日 歷勞苦於至艱 爰至今身 命亦危於晝電 再思積行 功未半於秋毫 或反道而欺天 或黷尊而犯上 或漏慢經法 或凌侮父師 或治家失孝悌之歡 或臨事濫公私之節 或殄穢於真館 或犯突於上靈 或冒大禁於三光 或墮嚴禋於七世 或傷殘物命 或淫祀鬼神 或沉湎酒醪 或昏迷聲色 或積財於不義 或運智於多岐 或狠愎自賢 或饕餮無狀 或奉道虧立功之行 或居家迷開訓之儀 或稟人倫 或沉女弱 共淪五欲 已劇千生 迪惟高聖之宣慈 大庇含生而開度 醮主某詣道自首 祈天博容 伏乞璇極上真玉虛大帝垂恩枯骨 錫命行尸 解片體之陰愆 除億曾之冥考 閱罪先期於冰釋 逆釐次佇於雲臻 俯伏對敷 屏營待報 欲陳詞意 仰進丹闈 臣雖已考詳 尚虞踏駁 謹冒天禁 戰悸宣聞

次宣青詞

具如詞旨

備極精虔

冀伸欽佇之心

用謝生成之賜

醮主弟

太上消災祈福醮儀

清微藏書閣

子伏願齋功紀籍 道果資身 增壽祿於將來 保年齡於向去 仰荷真靈之德 惟蘄福祐之恩 臣與醮主等不任激切之至 謹稽首再拜

次再上香獻酒

次奏亞獻法事

臣謹重誠上啟

三清上聖 十極威靈

臣聞 玉帝鑒觀 金真洞察 感群生而布款 采庶品以流恩

上士希仙 即萬仙而漿就 善人徼福 乃百福以妙嚴 理貴精微

事符歆答 今醮主弟子某伏為某事 騰詞清夜 馳意紫閣 夙啟蘭

科 仰膺靈貺 伏願醮主弟子某落除世網 進補仙階 許映全家

俱入華陽之洞 劉綱盡室 並昇丹綠之輶 陰陽之數已逃 生死之

根永謝 或干祿仕 冀登踐於崇高 或計貲儲 滙豐盈於貨殖 尊

卑福履 中外欣昌 幽冥息人鬼之非 出處有亨嘉之會 慶均嗣續

庇及親疏 水火兵賊之災虞 無侵里閭 日月星辰之否厄 不犯

形軀 長邁百昌 永逃九厄 臣與醮主等不任祈祝之至 所獻錢馬

都狀之儀 恭對醮筵 謹當敷奏

次奏錢馬 三上香 獻酒

次奏終獻法事

臣謹重誠上啟

三清上帝 十極高真 三界官屬 醮席真靈

臣聞 瀆則不告 聖人垂簡易之文 天且弗違 大道順披陳之

素 醮主某密形至懇 仰叩靈恩 敢不盡畏丹心 動防司殺 奉明

科而視履 約仙禁以踐言 一日告盟 百身無斃 伏況法事粗悉

罄寶目於鴻儀 夜如何其 落銀河於清漢 鳳冠燈焰 將暗於九光

鵲尾鑪香 欲殘於百和 洞章八闕 玉酒三終 燎朱火於天錢

即歸空際 促瓊鍾於仙籟 將返霄間 絳節逶迤 紫旂容與 還玉

京者 無極之尊帝 復金闕者 太上之真皇 眾靈咸從於丹轅 列

聖皆驂於紫策 傍飛月鳳 指洞室以分驅 俯控雲龍 瞰滄溟而下

邁 神司復位 將吏還天 委禧福以充庭 瞥靈光而在目 至於生

生萬品 皆均樂育之私 寂寂九幽 盡被超升之澤 臣與醮主等凝

瞻法從 結想太空 泣恨塵岐 難留聖躅 臣等不勝攀戀禱祝望恩

之至 謹稽首再拜奉送

太上消災祈福醮儀

清微藏書閣

次送神頌

次遣官還位

臣醮奏事訖 向來所出功曹使者 各從眾妙門而入 在左還左

在右還右 直使功曹主領檢押 復安金堂玉室 須召即到 一如

故事

次復爐

香官使者 左右龍虎君 侍香諸靈官 當令醮奏之所 自然生

金液 丹碧芝英 百靈眾真 交會在此香火鑪前 伏願醮主受福

闔家蒙恩 十方仙童 玉女侍衛 香煙傳奏 向來所啟之言 速達

逕御

至真無極大道

三清上聖

昊天玉皇上帝 御前

太上消災祈福醮儀竟

天運癸巳年酉月正一天師清微弟子洪鼎堅率門人

羅大英 安羅飛恭錄彙編李金強複校